

Date – 01/02/2026
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. **Sports Minister Pu Lalngthinglova Hmar chuan Reliance Foundation leh Mizoram Football Association buatsaih, naupangte football match 10,000 khelh tlin a lawmpui.**
2. **Revenue Minister Pu B Lalchhanzova chuan, Indian Air Force in Lengpui leh Sihphir ram a lei chungchang chu eptuten CBI chhui tir an duh chuan chhui tir tura an phut thu leh an lo ngaihchan dawn thu a sawi.**
3. **Sairang rel station-a khualzin phurtu Sairang khaw mi khualzin phur lirthei nei te leh Aizawl atanga chhuk thin taxi khalhtute chu nimin khan passenger lak dan phung chungchangah an in au buai a, police te nen sawihoin an inrem.**
4. **Prime Minister Narendra Modi chuan vawiin hian Sant Guru Ravidas pian champha vawi 649-na pualin Punjab a tlawh dawn.**

<><><>

SPORTS MINISTER

Reliance Foundation leh Mizoram Football Association buatsaih, naupangte football inelna chu match 10,000 khelh tlin a lo ni ta a, he mi puala Rajiv Gandhi Stadium, Mualpuia hun tawi buatsaih chu nimin khan Sports Minister Pu Lalngthinglova Hmar chuan a hmanpui.

Pu Lalngthinglova Hmar chuan, India rama a vawi khatna ni turin Reliance Foundation chuan Mizoramah naupangte awmze neia football an zirna turin League mumal tak a kalpui niin a sawi a, he inelna Naupang League tih hi football hmasawna atan, naupang chher chhuahna atan leh discipline kenkawhna atan duhthusam a ni, a ti a, a bul tantu zinga a tel ve thei chu lawmawm a tih thu sawiin tuna a thlen chin chu an ngaihtuah phak piah lam a nih tawh thu a sawi.

He Naupang League hi Aizawl, Lunglei, Champhai leh Kolasib-ah kalpui niin naupang kum 6-14 inkar awmze neia football inelna a ni a, kum 2022-a khelh tan niin a senso hi Reliance Foundation-in a tum a, Mizoram Football Association leh an hnuai District Football Association-in a kalpui a, naupangte hian kum khatah competitive match vawi 30 chuang an khel a ni.

Naupang League bakah hian Reliance Foundation hnuai kalpui mek Costal League-ah match 10,000 khelh tlin lawmna hi MFA Honorary Secretary

Pu Lalrengpuia'n a kaihruai a, MFA hruaitute, Reliance Foundation Young Champs aiawhte, players bakah naupang nu leh pate an tel a ni.

Naupang League hnuaiah hian District paliah naupang 3,500 chuang an awm mek.

<><><>

ZPM

Revenue Minister Pu B Lalchhanzova chuan, Indian Air Force in Lengpui leh Sihphir ram a lei chungchang an zirchian hnu in MNF in ram hralh a lo tum a ti a, hemi chungchang hi eptuten CBI chhui tir an duh chuan chhui tir tura an phut thu leh an lo ngaihchan dawn thu a sawi.

Nimina ZPM Media Cell Chairman a nihnaa party mi te nena Aizawl Press Club-a chanchinbumite an kawmnaah he thu hi Minister chuan a sawi a. Ram himna turin rilru fim tak pu chungin ram lak dan, Acquisition dan dik takin IAF hnenah ram hi hralh ni loa hawh tura hma lak a ni a ti a.

He thilah hian Chief Minister Pu Lalduhoma kut a fai tih an hriat thu sawiin kut fai lo anga an awm a nih chuan lipse an ngam a. Revenue Minister a nih ang pawha lipse a ngam thu sawiin mipui kuta awm an nih thu leh he thil hi politics inbeihna ringawtah tawp lo se a duh thu a sawi a ni.

Minister chuan Uluk taka Document te an chhui leh an indawr tawn dan an en letin MNF sawrkar lai khan lo ti fel hman ta se, IAF hnenah hian chatuan atan Mizoram leilung hi an lo hralh fel hmak dawn tihna a lo ni a ti a, MNF sorkar leh IAF indawrnaah chuan hralh tumna - outright purchase vek a ni a ti.

Mizoramin inhumhimna a neih Bengal Eastern Frontier Regulation Act, 1873 te, Mizoram Land Revenue Act, 2013 te sawilan a ni ngailo tih sawiin Outright purchase an remtihlohna sawi lang miah loin IAF hnenah hian ram hi hralh an lo tum hle a ti a. Hei hi document hrang hrang pawhin a tihchian thu sawiin ZPM sorkar chuan thil awm dan a lo hriata a zirchian hnuin MNF in ram hralh a lo tum dan Outright purchase chu a him lohzia hriaa Land Acquisition dan ang thlapa hma lak tha a tih angin hma an lak zui thu a sawi a ni.

Mipui ten thudik hriat hi an chanvo anih avangin ZPM party chuan CBI chhuitir ngei an duh a tih sawiin he thil kaihnawih hre tura ngaih politician te chu Pu Lalruatkima Revenue Minister hlui, Pu H. Rammawi Ex Planning Board Vice Chairman, tuna Congress party Senior Vice President ni mek Pu Lalnunmawia Chuaungo, GAD changtu thin Chief Minister Pu Zoramthanga te an ni a ti a,

Pu H Rammawi hian rang zawka hmala turin DC Aizawl a nawr thu an hmu a; MNF hunlaia IAF hnena ram hralh tuma hmalak hun lai chu kum 3 kalta-Ni 12-2-2019 atanga 29-10-2021 a ni tih sawiin hei hi Pu Lalnunmawia Chuango Chief Secy a nih lai a ni a ti a, an ni hian thudik sawi duhse sawi tur an nei hlawm ngei anga, an ngawi ral dawn nge thudik inthup an puang dawn tih chu an ngak ta thup mai a ni, a ti.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

SAIRANG REL STATION

Sairang rel station-a khualzin phurtu Sairang khaw mi khualzin phur lirthei nei te leh Aizawl atanga chhuk thin taxi khalhtute chu nimin khan passenger lak dan phung chungchangah an in au buai a, police te nen sawihoin an inrem leh.

Sairanga khualzin phurtute chuan rel station-a khualzin lo thleng te chu Aizawl atanga khualzin phurh tuma chhuk thin ten phalna chin pelin platform atanga hnai tak, ILP enfiahna bul lawkah te passenger an chang thin tih Akashvani News an hrih a. Thuneituten dinna tur bik an tihah din ho puiah sawmin phalna chin pela a chhunga va ding bik loin a pawn lam deuha kal ve mai tura an inhrilh thin thu leh a chang chuan tharum tel loin an in au a, an in nawr chhuah ve thin thu an sawi a. DC hoa tun hnaia an thutkhawmah pawh hei hi sawiin DC pawhin a dinna tur taka an ding thin chu fakawm a tih thu a sawi tih an sawi a. Hetihlaia a veng tur police indaih loh kara Aizawl atanga lokal te phal loh chin chhunga an kal leh mai thin chu na an tih thu an sawi a. Aizawl atanga taxi thenkhatin an lo dan pawhin police te kalin tharum thawhna telloa an inrem theih thu an sawi a ni.

Taxi lam hruaitute chuan Akashvani zawhna chhangin Sairang lam lirthei neituten Sairang lirtheiin passenger an lak zawh hma chu Aizawl atanga khualzin phurh tuma kal ten passenger lak ve a rem lo tia an lo sawi chang a awm thu leh buaina neuh neuh a lo awm thin tawh thu an sawi a. Nikumah pawh Sairang OC te nen inremna neiin nikum vekah Aizawl SP kaihhruainain inremna pawh a lo awm tawh a, amaherawhchu heng hian awmzia a neih lo a, DC in inremna siampui a tuma hma a lak pawhin a tawp lamah Sairang lamin an sign theih loh avangin a nih ang anga an din tak mai thu an sawi.

Hetihlai hian, nimina harsatna a thlen hnua an thutkhawm naah Sairang lam chuan harsatna an siam loh tur thu leh Joint Meeting te pawh neih an duh thu an sawi tih taxi hruaitute chuan an sawi a. Din dan tur anga ruahman sa angin harsatna insiam tawn loa inrem taka din flana a din hmasak dan indawta passenger chan tlan chu an duh ber a nih thu an sawi a ni.

Police hotute chuan Akashvani zawhna chhangin nimin bika harsatna hrang hrang awm chu chingfel tawha an inngaih thu leh buaina engmah a awm tawh rih loh thu an sawi a ni.

<><><>

PM to visit Punjab

Prime Minister Narendra Modi chuan vawiin hian Sant Guru Ravidas pian champha vawi 649-na pualin Punjab a tlawh dawn. Adampur airport a tlawh dawn a, Airport hming thar tur Sri Guru Ravidas Ji Airport, Adampur tiin a hming thlak thu a puang dawn a. Prime Minister office chuan Adampur Airport hming thlak a ni chuan, mi thianghlim, khawtlang tanna nun pe, mihring intluktlanna ngaipawimawh tu a chawimawina a ni, a ti.

Prime Minister hian Ludhiana-a Halwara Airport-a Terminal Building chu a hawng dawn bawk a. Terminal Building hian Ludhiana leh a chhehvela industry leh agriculture ram -te a huam dawn a. Halwara hi Indian Air Force station pawimawh tak pakhat a ni bawk a ni. Airport chu thlawhna te chauh a tum theih avangin, A320 aircraft tum ve theihna tur leh inkalpawhna tihthaa tihzau zual turin airport chu tih zau a ni.

<><><>